

陸宣公集

第一冊



皇朝通志

朕歷觀古來士之逢時
遘會建功立業為社
稷之重臣者國家以大
任所托負者甚鉅展命
者兆考中必取辨於旦

夕去哉必其平日讀書

論世於古人之著作經

國之良模講貫而熟

復之明經遠用然後

遺大投鉉之以據任而

餘川陝督臣年羹堯
才猷敏練學識明通

聖祖皇帝昇以股肱心膂

之寄自蒞官秦蜀以來
諳邊疆之形勢念民力

之作苦每有章奏皆

指畫詳明敷陳剝切

其慘忠愛之字時流

竄於行墨之間固其素所

蘊蓄者然也既又以所

刊陸贄奏議進呈考
贄之在唐以忠誠結主
知中外號為內相宋儒
稱其學問純粹五經
流事功具載文集五

補于考時可傳於後世

乃磨年既久陳編故步

浮淺已多舛謫不少

本校訂精核魯魚無誤

朕披覽茲過深為嘉

貴曰序其大凡并法

首簡名以精臣之宜

欲凡為人臣者朝夕

誦見法躬行踵其事

以守官資其議以敷政

龍國經書之謨安上治
民之暇悉於志乎在其
為功顧不偉哉



雍

漢發正
建御業
正信



臣自少讀書酷嗜唐陸贄奏議迨通籍以後久
置篋衍去年在關中退食之暇檢閱舊本蠹粉
散落字畫缺訛重加校訂雕刊成帙今春入覲
天顏對揚殿陛指陳西陲風土舉措事宜荷蒙

溫綸採納恩典頻頒異數殊榮罕有倫比臣隨以新
刻陸贄奏議進呈比塵

睿覽即膺褒獎臣拜手謝

恩星馳旋陝於八月十二日

巽命重申日邊啣出臣焚香恭接懼忭開楫

御製叙文俾冠首簡大文炳蔚榮光燭天臣伏地莊

誦神悚心慙竊惟臣謬沾雨露職守封疆籌策

未諳片長莫展祇以致治之道酌古所以準今

馭世之規觀前即以示後陸氏一集所言皆切

治平懷此葵忱敢用上獻詎期重以

宸章微言提要金泥芝檢日麗星輝非獨臣渥被

寵光力圖報効即陸贄身後邀榮亦感勒於九原矣

臣謹即付剞劂用裝錦軸家藏珍重傳之世世
子孫更廣為傳播遠至山陬海澨家家誦習切
墨引繩行見羣工式序庶績咸熙陸氏遺編得
王言而增重竟成一代之新書永作千秋之金鑑也
已

雍正元年八月十六日 臣年羹堯恭紀



卷之八十五

...

...

...

...

有唐陸敬輿先生制誥奏議之文義烈

感人心文章鏘金石自宋臣蘓軾范祖

禹等元祐進呈以來人知尊奉板行不

絕迄於今日已如日月经天江河行地

豈猶有待於表章而宣布之者顧向所

流傳率多訛字余自受讀以來留心購

按迄無善本夫先生之文本非有子雲
之艱深退之之佶屈正以其周盡事情

人人可曉故足以興起來學感發性情

如今諸刊本往往於敷陳剴切之處讀

者方且揮涕激昂而一字之誤喉吻輒

為之囁嚅或指畫詳盡之際讀者不勝

開心領會而片言之譌神志亦為之晦
味余以此為恨二十年於茲今於退食
之暇與二三文士校讐而商榷焉訂訛
析疑雖不敢謂盡得作者之真較諸舊
本庶幾十正其七八爰授梓人以公諸
世譬猶仰日月者去其浮雲之翳而瞻

矚益明行江河者屏其沙礫之淤而溯
游愈便先生之文固不待此為輕重而
於讀先生之文者未必無小助云

康熙六十一年壬寅仲春上浣雙峰後
學年羹堯書於積雪齋



唐陸宣公翰苑集序

唐權德輿撰

嘗讀賈誼書觀其經制人文鋪陳帝業術亦至矣待
之宣室恨得後時遇亦深矣然竟不能達四聰而盡
其善排羣議而試厥謀道之難行亦已久矣東陽絳
灌何代無之嘻一薰一蕕善齊不能同其器方鑿圓
枘良工無以措巧心所以理世少而亂日多大雅衰
而正聲寢漢道未融旣失之於賈傅吾唐不幸復擯
棄於陸公公諱贄字敬輿吳郡蘇人溧陽令侃之子
年十八登進士第應博學宏辭科授鄭縣尉非其好
也省母歸壽春刺史張鎰有名於時一獲晤言大加

賞識暨別鎡以泉貨數萬為賚曰願以此奉太夫人
一日之膳公悉辭之領新茶一串而已是歲以書判
拔萃調渭南簿

本傳
作尉

御史府以監察換之德宗皇帝春

宮時知名召對翰林即日為學士由祠部員外轉考

功郎中朱泚之亂從幸奉天時車駕播遷詔書旁午

公灑翰即成不復起草初若不經思慮及成而奏無

不曲盡事情中於機會倉卒填委同職者無不拱手

歎伏不能復有所助嘗從容奏曰此時詔書陛下宜

痛自引過以感人心昔禹湯以罪已勃興楚昭以善

言復國陛下誠能不恡改過以言謝天下俾臣草辭

無諱庶幾羣盜革心上從之故行在詔書始下雖武人悍卒無不揮涕激發議者以德宗克平寇亂不惟神武之功爪牙宣力蓋亦資文德腹心之助焉及還京師李抱真來朝奏曰陛下在山南時山東士卒聞書詔之辭無不感泣思奮臣節臣知賊不足平也公自行在帶本職拜諫議大夫中書舍人精敏小心未嘗有過艱難扈從行在輒隨啓沃謀猷特所親信有時讌語不以公卿指名但呼陸九而已初幸梁洋棧道危狹從官前後相失上夜次山館召公不至泣然號於禁旅曰得陸贄者賞千金頃之公至太子親王

皆賀初公既職內署母韋氏尚在吳中上遣中使迎
致京師道路置驛文士榮之丁韋夫人憂去職持喪
於洛遣人護溧陽之柩附葬河南上遣中使監護其
事四方賻遺數百萬公一無所取素與蜀帥韋南康
布衣友善韋令每月置遺公奏而受之服闋復內職
權知兵部侍郎覲見之日天子爲之興改容敘弔優
禮如此內外屬望旦夕俟其輔政爲竇參忌嫉故緩
之真拜兵部侍郎知貢舉得人之盛公議稱之貞元
八年拜中書侍郎平章事公以少年入侍內殿特蒙
知遇不可與衆浮沉苟且自愛事有不可必諍之上

察物太精躬臨庶政失其大體動與公違姦諛從而
間之屢至不悅親友或規之公曰吾上不負天子下
不負吾所學不恤其他公精於吏事斟酌剖決不爽
錙銖其經綸制度具在德宗實錄及竇參納劉士寧
之賂爲李巽所發得罪左遷橫議者以公與參素不
協歸罷相之議於公戶部侍郎判度支裴延齡以姦
回得幸害時蠹政物議莫敢指言公獨以身當之屢
言不可翰林學士吳通元忌公先達每切中傷陰結
延齡互言公短宰相趙憬公之引拔升爲同列以公
排邪守正心復異之羣邪沮謀直道不勝十年退公

爲賓客罷政事明年夏旱芻糧不給軍校訴於上延
齡奏曰此皆陸贄輩怨望鼓扇軍人也貶公忠州別
駕上怒不可測賴陽城張萬福救之獲免蜀帥韋令
抗表請以贄代己歲賂資糧公在南賓閉門却掃郡
人稀識其面復避謗不著書惟考校醫方撰集驗方
五十卷行於世江峽十稔永貞初與鄭餘慶陽城同
徵還公已薨歿時年五十二公之秉筆內署也推古
揚今雄文藻思敷之爲文誥伸之爲典謨俾獮狡向
風懦夫增氣則有制誥集一十卷覽公之作則知公
之爲文也潤色之餘論思獻納軍國利害巨細必陳

則有奏草七卷覽公之奏則知公之爲臣也其在相位也推賢與能舉直措枉將幹璿衡而揭日月清氛沴而平泰階敷其道也與伊說爭衡考其文也與典謨接軫則有中書奏議七卷覽公之奏議則知公之事君也古人以士之遇也其要有四焉才位時命也仲尼有才而無位其道不行賈生有時而無命終於一慟惟公才不謂不長位不謂不達逢時而不盡其道非命歟裴氏之子焉能使公不遇哉說者又以房魏姚宋逢時遇主克致清平陸君亦獲幸時君而不能與房魏爭列蓋道未至也應之曰道雖在我弘之

在人蜚蝗竟天農稷不能善稼奔車覆轍丘軻亦廢
規行若使四君與公易時而相則一否一臧未可知
也而致君不及貞觀開元者蓋時不幸也豈公不幸
哉以爲其道未至不亦誣乎公之文集有詩文賦集
表狀爲別集十五卷其關於時政昭昭然與金石不
朽者惟制誥奏議乎雖已流行多謬編次今以類相
從冠于編首兼略書其官氏景行以爲序引俾後之
君子覽公制作效之爲文爲臣事君之道不其偉歟

宋進呈奏議劄子

元祐八年五月七日蘇軾同呂希哲吳安詩豐稷趙
彥若范祖禹顧臨劄子奏臣等猥以空疎備員講讀
聖明天縱學問日新臣等才有限而道無窮心欲言
而口不逮以此自愧莫知所爲竊謂人臣之納忠譬
如醫者之用藥藥雖進於醫手方多傳於古人若已
經効於世間不必皆從於己出伏見唐宰相陸贄才
本王佐學爲帝師論深切於事情言不離於道德智
於子房而文則過辯如賈誼而術不踈上以格君心
之非下以通天下之志但其不幸仕不遇時德宗以

苛刻爲能而贄諫之以忠厚德宗以猜疑爲術而贄
勸之以推誠德宗好用兵而贄以消兵爲先德宗好
聚財而贄以散財爲急至於用人聽言之法治邊馭
將之方罪己以收人心改過以應天道去小人以除
民患惜名器以待有功如此之流未易悉數可謂進
苦口之藥石鍼害身之膏肓使德宗盡用其言則貞
觀可得而復臣等每退自西閤即私相告言以陛下
聖明必喜贄議論但使聖賢之相契即如臣主之同
時昔馮唐論頗牧之賢則漢文爲之太息魏相條鼂
董之對則孝宣以致中興若陛下能自得師莫若近

取諸贄夫六經三史諸子百家非無可觀皆足爲治
但聖言幽遠末學支離譬如山海之崇深難以一二
而推擇如贄之論開卷了然聚古今之精英實治亂
之龜鑑臣等欲取其奏議稍加校正繕寫進呈願陛
下置之坐隅如見贄面反復熟讀如與贄言必能發
聖性之高明成治功於歲月臣等不勝區區之意

唐陸宣公集目錄

卷第一

制誥

奉天改元大赦制

平朱泚後車駕還京大赦制

卷第二

制誥

貞元改元大赦制

冬至大禮大赦制

卷第三

陞宣公集
目錄
制誥

貞元九年冬至大禮大赦制

蝗蟲避正殿降免囚徒德音

誅李懷光後原宥河中將吏并招諭淮西詔

誅李希烈後原宥淮西將吏并授陳仙奇節

度詔

重宥淮西將士詔

卷第四

制誥

賑卹諸道將吏百姓等詔

優卹畿內百姓并除十縣令詔

重優復興元府及洋鳳等州百姓詔

議減鹽價詔

賜京城及同華等州百姓種子賑給貧人詔

賜將士名奉天定難功臣詔

改梁州為興元府并洋州為望州詔

卷第五

制誥

奉天遣使宣慰諸道詔

收復京師遣使宣慰將吏百姓詔

陸宣公集
平淮西後宴賞諸軍將士放歸本道詔
加王武俊李抱真官封并招諭朱滔詔

招諭淮西將吏詔

招諭河中詔

安撫淮西歸順將士百姓勅

甄獎陷賊守節官詔

令百寮議大禮期日詔

不許諸軍侵擾勅

放淮西生口歸本貫勅

令諸道募靈武鎮守人詔

卷第六

制誥

冊淑妃王氏爲皇后文

冊嘉誠公主文

冊蜀王妃文

冊杞王妃文

告謝昊天上帝冊文

告謝元宗廟文

告謝肅宗廟文

告謝代宗廟文

祭大禹廟文

制策問賢良方正能直言極諫科

制策問博通墳典達於教化科

制策問識洞韜略堪任將帥科

答宰臣請停大禮表

答百寮請停大禮表

答第二表

答第三表

答百寮賀利州連理木表

答宰臣請復御膳表

答百寮請復御膳表

卷第七

制誥

李晟司徒兼中書令制

蕭復劉從一姜公輔平章事制

張延賞中書侍郎平章事制

渾瑊侍中制

盧翰劉從一門下中書侍郎平章事制

劉滋崔造齊映平章事制

李納檢校右僕射平章事制

陸宣公集
韓滉檢校左僕射平章事制

李勉太子太師制

姜公輔左庶子制

崔造右庶子制

盧翰太子賓客制

卷第八

制誥

賈耽東都留守制

崔縱東都留守制

普王荆襄江西等道兵馬都元帥制

馬燧渾瑊副元帥招討河中制

李晟鳳翔隴西節度兼涇原副元帥制

劉洽檢校司空充諸道兵馬都統制

卷第九

制誥

渾瑊京畿金商節度使制

杜亞淮南節度使制

虔王申光隨蔡等州節度使制

唐朝臣振武節度使論惟明廊坊觀察使制

韓滉加檢校右僕射制

陸宣公集 目錄 五
嘉王橫海軍節度使制

馬燧李臯賜實封制

韓滉度支鹽鐵轉運等制

李叔明右僕射制

李澄贈司空制

除鄧州歸順官制

李納檢校司空制

卷第十

制誥

賜李納王武俊等鐵券文

賜安西管內黃姓纛官鐵券文

慰問四鎮北庭將吏勅書

與回紇可汗書

賜吐蕃將書

賜吐蕃宰相尚結贊書三

卷第十一

奏草

論兩河及淮西利害狀

論關中事宜狀

卷第十二

奏草

論敘遷幸之由狀

奉天論奏當今所切務狀

奉天論前所答奏未施行狀

卷第十三

奏草

奉天請數對羣臣兼許令論事狀

奉天論尊號加字狀

重論尊號狀

奉天論赦書事條狀

卷第十四

奏草

奉天論擬與翰林學士改轉狀

奉天請罷瓊林大盈二庫狀

奉天論解蕭復狀

奉天薦素高等狀

奉天論李晟所管兵馬狀

奉天奏李建徽揚惠元兩節度兵馬狀

駕幸梁州論進獻瓜果人擬官狀

又論進瓜果人擬官狀

卷第十五

奏草

興元論解姜公輔狀

又答論姜公輔狀

興元論請優獎曲環所領將士狀

興元論解蕭復狀

又答論蕭復狀

興元論續從賊中赴行在官等狀

卷第十六

奏草

興元賀吐蕃尚結贊抽軍迴歸狀

興元奏請許渾瑊李晟等諸軍兵馬自取機
便狀

興元請撫循李楚琳狀

興元論中官及朝官賜名定難功臣狀

興元論賜渾瑊詔書爲取散失內人等議狀

鑾駕將還宮闕論發日狀

請釋趙貴先罪狀

論替換李楚琳狀

收河中後請罷兵狀

陸宣公集
卷第十七

中書奏議

請許臺省長官舉薦屬吏狀

請遣使臣宣撫諸道遭水州縣狀

論淮西管內水損處請同諸道遣宣慰使狀

謝密旨因論所宣事狀

卷第十八

中書奏議

論嶺南請於安南置市舶中使狀

論宣令除裴延齡度支使狀

論齊映齊抗官狀

請減京東水運收脚價於緣邊州鎮儲蓄軍糧事宜狀

卷第十九

中書奏議

論緣邊守備事宜狀

商量處置竇參事體狀

奏議竇參等官狀

請不簿錄竇參莊宅狀

卷第二十

中書奏議

請還田緒所寄撰碑文馬絹狀

請依京兆所請折納事狀

議汴州逐劉士寧事狀

請不與李萬榮汴州節度使狀

論度支令京兆府折稅市草事狀

論左降官準赦合量移事三狀

論邊城貯備米粟等狀

卷第二十一

中書奏議

論裴延齡姦蠹書一首

論朝官闕員及刺史等改轉倫序狀

卷第二十二

中書奏議

均節賦稅恤百姓六條

唐陸宣公集目錄

唐陸宣公集卷第一

後學雙峰年羹堯重訂

金壇王汝驤

同校

太倉張泰基

制誥

赦宥上

奉天改元大赦制

平朱泚後改建中五年為興元元年

門下致理興化必在推誠忘己濟人不吝改過朕嗣
守丕構君臨萬方失守宗祧越在草莽不念率德誠
莫追於既往永言思咎期有復於將來明徵厥初以
示天下惟我烈祖邁德庇人致俗化於和平拯生靈
於塗炭重熙積慶垂二百年伊爾卿尹庶官洎億兆

之衆代受亭育以迄于今功存于人澤垂于後肆予
小子獲纘鴻業懼德不嗣罔敢怠荒然以長于深宮
之中暗于經國之務積習易溺居安忘危不知稼穡
之艱難不察征戍之勞苦澤靡下究情不上通事既
壅隔人懷疑阻猶昧省已遂用興戎徵師四方轉餉
千里賦車籍馬遠近騷然行齋居送衆庶勞止或一
日屢交鋒刃或連年不解甲冑祀奠之主室家靡依
生死流離怨氣凝結力役不息田萊多荒暴命峻於
誅求疲眊空於杼軸轉死溝壑離去鄉閭邑里丘墟
人煙斷絕天譴於上而朕不悟人怨於下而朕不知

馴致亂階變興都邑賊臣乘釁肆逆滔天曾莫愧畏
敢行凌逼萬品失序九廟震驚上辱于祖宗下負于
黎庶痛心覩貌罪實在予永言愧悼若墜深谷賴天
地降祐神人叶謀將相竭誠爪牙宣力屏逐大盜載
張皇維將弘永圖必布新令朕晨興夕惕惟念前非
乃者公卿百寮累抗章疏猥以徽號加于朕躬固辭
不獲俯遂輿議昨因內省良用矍然體陰陽不測之
謂神與天地合德之謂聖顧惟淺昧非所宜當文者
所以成化武者所以定亂今化之不被亂是用興豈
可更徇羣情苟膺虛美重余不德祇益懷慙自今以

後中外所上書奏不得更稱聖神文武之號夫人情
不常繫于時化天道既隱亂獄滋豐朕既不能弘德
導人又不能一法齊衆苟設密網以羅非辜爲之父
母實增愧悼今上元統曆獻歲發生宜革紀年之號
式敷在宥之澤與人更始以答天休可大赦天下改
建中五年爲興元元年自正月一日昧爽以前大辟
罪已下罪無輕重咸赦除之李希烈田悅王武俊李
納等有以忠勞任膺將相有以勲舊繼守藩維朕撫
馭乖方信誠靡著致令疑懼不自保安兵興累年海
內騷擾皆由上失其道下罹其災朕實不君人則何

罪屈已弘物予何愛焉庶懷引慝之誠以洽好生之德其李希烈田悅王武俊李納及所管將士官吏等一切並與洗滌各復爵位待之如初仍即遣使分道宣諭朱滔雖與賊泚連坐路遠未必同謀朕方推以至誠務欲弘貸如能效順亦與惟新其河南北諸軍兵馬並宜各於本道自固封疆勿相侵軼朱泚大爲不道棄義蔑恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其扇誘有迫以兇威苟能自新理可矜宥但官軍未到京城以前能去逆効順

及散歸本道者並從赦例原免一切不問天下左降
官即與量移近處已量移者更與量移流人配隸及
藩鎮効力并緣罪犯與諸使驅使官兼別勅諸州縣
安置及得罪人家口未得歸者一切放還應先有痕
累禁錮及反逆緣坐承前恩赦所不該者並宜洗雪
亡官失爵放歸勿齒者量加收敘人之行業或未必
兼構大厦者方集於羣材建奇功者不限於常檢苟
在適用則無棄人況黜免之人沉鬱既久朝過夕改
仁何遠哉流移降黜亡官失爵配隸人等有材能著
聞者特加錄用勿拘常例諸軍使諸道赴奉天及進

收京城將士等或百戰摧敵或萬里勤王扞固全城
驅除大憝濟危難者其節著復社稷者其業崇我圖
爾功特加彝典錫名疇賦永永無窮宜並賜名奉天
定難功臣身有過犯遞減罪三等子孫有過犯遞減
罪二等當戶應有差科使役一切蠲免其功臣已後
雖衰老疾患不任軍旅當分糧賜並宜全給身死之
後十年內仍回給家口其有食實封者子孫相繼代
代無絕其餘敘錄及功賞條件待收京日並準去年
十月十七日十一月十四日勅處分諸道諸軍將士
等久勤扞禦累著功勳方鎮克寧惟爾之力其應在

陸宣公集 卷一
行營者並超三資與官仍賜勳五轉不離鎮者依資
與官賜勳三轉其累加勳爵仍許回授周親内外文
武官三品已上賜爵一級四品已上各加一階仍並
賜勳兩轉見危致命先哲攸貴掩骼葬齒禮典所先
雖効用而或殊在惻隱而何間諸道將士有死王事
者各委所在州縣給遞送歸本管官爲葬祭其有因
戰陣殺戮及擒獲伏辜暴骨原野者亦委所在逐近
便收葬應緣流貶及犯罪未葬者並許其家各據本
官品以禮收葬自頃軍旅所給賦役繁興吏因爲姦
人不堪命咨嗟怨苦道路無聊汔可小康與之休息

其墊陌及稅間架竹木茶漆摧鐵等諸色名目悉宜
停罷京畿之內屬此寇戎攻劫焚燒靡有寧室王師
仰給人以至重勞特宜減放今年夏稅之半朕以兇醜
犯闕遽用于征爰度近郊息駕茲邑軍儲克辦師旅
攸寧式當褒旌以志吾過其奉天宜升爲赤縣百姓
並給復五年尚德者教化之所先求賢者邦家之大
本永言茲道夢想勞懷而澆薄之風趨競不息幽棲
之士寂寞無聞蓋誠所未孚故求之未至天下有隱
居行義才德高遠晦跡丘園不求聞達者委所在長
吏具姓名聞奏當備禮邀致諸色人中有賢良方正

能直言極諫及博通墳典達於教化并洞識韜鈴堪
任將帥者委常參官及所在長吏聞薦天下孤老鰥
寡惻獨不能自活者並委州縣長吏量事優恤其有
年九十已上者刺史縣令就門存問義夫節婦孝子
順孫旌表門閭終身勿事大兵之後內外耗竭貶食
省用宜自朕躬當節乘輿之服御絕宮室之華飾率
已師儉爲天下先諸道貢獻自非供宗廟軍國之用
一切並停應內外官有冗員及百司有不急之費委
中書門下即商量條件停減聞奏布澤行賞仰惟舊
章今以餘孽未平帑藏空竭有乖慶賜深愧于懷赦

書有所未該者委所司類例條件聞奏敢以赦前事
相言告者以其罪罪之亡命山澤挾藏軍器百日不
首復罪如初赦書日行五百里布告遐邇咸使聞知

Blank columns for text.

平朱泚後車駕還京大赦制

門下致理之體先德後刑禮義興行故人知耻格教
令明當則俗致和平然後姦慝不萌暴亂不作古先
哲后莫不由斯國家受命百七十載八聖儲慶敷佑
下人邁種寬大之德累蠲苛酷之令蓋仁之所積者
厚故澤之所流者深茲予小子獲主重器懵於理亂
之本溺於因習之安授任不明賞罰乖當立法以齊
衆而犯命愈甚興戎以除害而長亂益繁賊臣蓄姦
乘豐竊發九廟乏祀兆人靡依猘獠肆其吞噬豺狼
穴於宮闕歲未云半載罹播遷仰慚穹昊俯愧臣庶

敢愛賈越苟全眇躬誠懼益縱寇讎重辱宗社忍耻
誓志庶補前羞賴億兆宅心不忘先德諸帥勦力恭
行天罰俾余寡昧再膺多祐總乾綱於既紊復天柱
於將傾言旋鎬京不改舊物宗祧有序朝享有期責
重慶多深增感惕嗚呼君者所以撫人也君苟失位
人將安仰朕既不德致寇興禍使生靈無告受制兇
威苟全性命急何能擇或虧廢名節或貪冒貨利陷
於法網事匪一端究其所由自我而致不能撫人以
道乃欲繩之以刑豈所謂恤人罪已之誠含垢布和
之義滌清污俗咸與更新可大赦天下自興元元年

七月二十三日昧爽已前大辟罪已下已發覺未發
覺已結正未結正見繫囚徒常赦所不原者咸赦除
之今年五月二十八日已前左降官即與量移未復
資者更與移近處流人及犯配隸藩鎮効力並即放
還亡官失爵放歸不齒者量加收敘未復資者更與
進改其黜免人等有素著行能傍連譴累特加錄用
勿以爲負不有忠者誰復社稷不有勞者誰從巡狩
連帥之重所以殿邦禦侮也二千石之任所以分憂
共理也方鎮將校勤奉戎役中外寮吏恪居官次國
有大慶所宜同之內外文武及致仕官三品已上賜

陸宣公集
卷一
爵一級四品已上加一階仍並賜勳兩轉司徒兼中
書令晟英特傑立光輔中興再定皇都一匡天下推
恩之典貽慶無窮宜與一子五品正員京官侍中城
沉邃忠厚服勞王家保全危城翦除大憝嘉乃茂績
次于寵章宜與一子六品正員京官鎮國軍潼關節
度使檢校右僕射駱元光京畿渭南商州節度使檢
校右僕射尚可孤邠寧等州節度使檢校右僕射韓
遊瓌奉天行營諸軍節度使檢校右僕射戴休顏咸
秉大節著于艱難同勳叶忠翼我興運宜各與一子
七品正員官諸道節度使及行在都知兵馬使興元

扈從左右金吾大將軍金吾六軍大將軍等各與一子八品正負官諸道團練觀察處置等使各與一子九品正負官應諸軍赴上都收復將士等俱以純誠奮其勇節連年帶甲百戰摧鋒有忘身以効命有滅親以徇義誓平國難如復私讎競揚貔虎之雄克清梟獍之孽策勲行賞傳嗣榮親播乃功名與國終始自去年冬已來未經甄敘者即與超八資改轉已經甄敘者更與超三資進改三品已上祖父母在先無官封者量與致仕官及邑號亡者並與追贈四品已下父母在先無官封者亦授致仕官及邑號亡者與

陞宣公集
卷一
追贈其賞錢委所司即依元勅支給應扈從將士三品已上賜爵兩級四品已下各加兩階仍並賜勲其祖父母官封追贈並準收京城將士例處分應扈從官普恩之外三品已上賜爵兩級四品已下各加兩階仍普賜勲三轉其祖父母父母封贈並準收京城例處分應扈從官普恩之外三品已上更加爵一級四品已下更加一階若常參官祖父母父母在先無官封者量授致仕官及邑號亡者與追贈諸州刺史普恩外賜爵一級諸道進奏陪位者更加一階其奉天定難及元從功臣宜令本軍本使即定名聞奏所

司各準元勅優賞其諸道軍鎮及行營將士三品已上賜爵一級四品已上加一階仍準今年正月一日制速與甄敘成德淄青魏博等節度并諸軍應歸順將士等各蘊誠義積著功勞由朕失於撫綏頃歲暫懷疑阻尋能勵節不替舊勲是資宴犒俾洽王澤宜委所司即約額支計各賜錢物賞設仍委本節度準前後勅速條疏甄敘其朔方并諸軍應在河中管內及同州將士等自遠赴難解其重圍念茲功勞並未酬報雖遭脅制情有可矜應到行營未經甄敘者並準元勅超五資改轉其賞錢比收京城將士例各給

附錄
卷一
一半委本軍兵馬使條錄名銜聞奏所司支計給付
其食實封者亦便配額令其請受應天下諸道軍將
士等如有年老及疾患尪弱不任軍旅願歸鄉里者
並給終身優復州縣切加安存勿令侵擾如無家可
歸者給田宅使得存濟見危致命先典所尚況忠衛
社稷殺身成功朕於斯人義有加等贈太尉秀實天
授貞烈沮茲姦邪蒼黃之中獨蘊雄斷將紓國難詭
收寇兵兇謀旣虧吾事果濟忠誠奮發手擊渠魁英
風凜然振邁千古宜卽差官致祭并旌表門閭府縣
護其喪事緣葬所要一切官供仍於墓所官爲立碑

以揚徽烈其所賜實封五百戶嫡子正負三品官諸
子授正員五品官委中書門下即準元勅處分應諸
道諸軍將士有身死王事者委本道本使具名銜聞
奏即與褒贈仍以在身官爵授其子孫内外文武官
及諸親諸色人等有橫遭逆賊殺害者各聽其家及
親識人於所司陳牒勘實聞奏亦與追贈如跡著忠
烈衆所明知仍訪其子孫量加優恤尚齒養老王風
之首三代制理未或遺年朕將遵古典以興化本人
心而教孝用優秩賜式慰里閭京兆府耆壽年八十
已上並與板授刺史仍賜紫八十已下及諸州府耆

壽年八十已上並與板授本縣令仍賜緋天下侍

疑侍字

老者壽亦各與板授官如年九十已上者州縣長吏
歲時躬親省問貧弱不能自存者量賜粟帛頃屬多
難人流俗弊加之以師旅因之以饑饉賦役繁起農
桑失時哀哉瘳人汔可小息然以國計猶歎軍實靡
充未盡復除良增愧悼應天下建中四年年終已前
所有諸色逋欠在百姓復內者一切放免百司及諸
軍諸使舉放利錢今年六月已前百姓欠負未納者
亦並停徵京兆府百姓普恩外給復一年其供頓官
吏委京兆尹類例具名銜聞奏量與優獎古者計戶

以署吏因時而建職既不乏事亦無冗負今田畝汗
萊版圖凋耗齊人編戶託庇官曹貪吏猾胥誘為囊
橐啓斲墮業為害尤深應在京百司色役人及流外
等委御史大夫即與諸司使長官審詳商議據見所
掌事之閑劇定額聞奏仍校名送中書門下務從減
省副朕憂人以後應須署置並定名先奏仍永為常
式今年正月一日赦書節目有所未行者所司並舉
而行之赦書或有不該即比類條件聞奏敢以赦前
事相言告者以其罪罪之亡命山澤挾藏軍器百日
不首復罪如初赦書日行五百里布告遐邇咸使聞

知

唐陸宣公集卷第一

唐陸宣公集卷第二

後學雙峰年羹堯重訂

金壇王汝驤

同校

太倉張泰基

制誥

赦宥中

貞元改元大赦制

興元二年正月一日

門下王者體元立極欽若乎天地纂業承統嚴奉于
祖宗用能百神允諧兆庶永賴立國之本斯其大經
朕燭理不明違道招損往遭多難淪陷國都天地宗
祧曠而莫主則是欽若嚴奉之義缺矣甚用懼焉洎
復京師遽將告謝有司以人力耗斲禮物廢隳日居

月諸歲聿云暮卜其吉日俯在上春齊心永懷坐以
待曙而百辟卿士抗疏上言咸謂人心未寧不足以
盡敬寇孽猶在不足以告功迫於羣情俯抑誠願郊
廟孔邇瞻言莫從悼心慚顏胡寧自處重以和平未
洽災沴荐臻去歲旱蝗兩河為甚人流不息師出靡
居加之以徵求因之以荒饉困窮殍餒轉死丘墟關
輔之間冬無積雪土膏未發宿麥不滋詳思咎徵有
為而致兵戎之後餘祲尚存獄犴之中深冤未釋又
河中淮右逆將阻兵汙脅齊人陷之死地雖欲白雪
厥路無由抱義銜冤足傷和氣此皆由朕爽德播災

于人爲之父母實用愧耻今元陰已謝春日載陽勾
萌畢伸幽蟄咸震思與海內同心自新發號更元用
符天意宜改興元二年爲貞元元年自正月一日昧
爽已前大辟罪已下已發覺未發覺已結正未結正
繫囚見徒罪無輕重咸赦除之先準勅令量移收敘
人所司據節文速與處分應河中脅從將士多是奉
天赴難功臣本居朔陞夙尚忠節豈以一夫註誤棄
其累代勲庸朕於此軍尤所不忍特宜洗滌待以初
誠自非與官軍決戰死於鋒刃其餘雖臨陣擒獲亦
從釋放棄逆歸順者在身先有官爵實封一切如舊

仍準前後勅所在便給賞錢并與甄敘如有因危効
節建立殊庸量其事績特加獎擢李懷光若能翻然
悔過束身赴朝念其嘗有大勲必當終始全護仍準
前勅授之官封朕於功臣庶亦無負淮西將吏百姓
等皆被劫制久爲匪人詢事原情諒非獲已今王師
四合計日誅夷玉石俱焚用增惻憫宜令諸道進軍
之日唯存首惡一人其餘徒黨悉從原宥如有歸順
及立功者並準河中將士例褒獎夫爲國之要在於
審官共理分憂守宰彌切闔境性命繫乎其人將使
里閭無愁苦之聲風俗興廉讓之教得不慎東髦彥

寄之化源自今已後諸州刺史有關中書門下於朝
官中精擇有理人才術者授之如刺史縣令在任頻
年課績尤異者擢授侍郎給舍郎官御史中外迭處
用觀其能賞罰必行期於競勸自頃選曹署吏唯以
書判求人務騁浮華莫稽實行且能言者不必適用
蘊用者或未能言凡爲擇人其在精覈宜令清資常
參官每年於吏部選人中各舉所知一人堪任縣令
錄事參軍者所司依資敘注擬便於甲曆之內具標
舉主名銜仍牒報御史臺如到任後政尤異者有贓
犯事跡著明者所司錄舉官姓名聞奏以爲褒貶其

陞宣公集 卷二
三
內外負及京城諸使名目委御史審勘會商量并省
停減仍集百寮定議務從簡約息費使人其京官職
田及息利官錢等黠吏詆欺移易疆畔或貧人轉徙
捕繫親鄰日月滋深耗弊彌甚亦令百寮議其折衷
擇善而行往以賦役殷繁人不堪命定為兩稅事額
易從比屬軍興或踰始制法無所守吏益為姦哀我
勞人汔可小息自諸道州府除兩稅外應有權宜科
率差使一切悉停京畿及近縣所欠百姓和糴價直
委度支即勘會支給諸道非臨寇賊州縣自冬已來
點召官健子弟並宜放散任營生業應經陷賊州縣

百姓屋宇被焚毀并貧病老弱及遭傷損之類所在
量加優恤使得安存天下名山大川并自古聖帝明
王賢臣烈士祠廟墳墓各委當處長吏擇日致祭必
資精潔以達志誠班制有差所以序賢也廩秩有等
所以明勸也今或高卑失序中外相踰至於卿士之
家尚糴凍餒之患忠信重祿豈其然耶內外官祿及
俸錢手力雜給等委中書門下度支即叅詳定額聞
奏應赴奉天及收城將士等並功存社稷節著艱危
中心藏之豈忘酬報頃緣府藏空竭賞給未周乃眷
勲臣實用增愧應準元勅合請賞錢人委所司節減

在官及百司費用據所有財物速與給付應在京城
及諸道立功將士等先有詔旨並許甄升所司勘會
淹歷時月委中書門下即準元勅處分諸軍行營并
河中朝邑被脅從將士家口在京及諸州府者宜令
本道節度觀察使安存賑恤各令優給應諸軍使立
仗見在城將士等共賜七萬匹制書有未該備所司
速比類條件聞奏敢以赦前事相言告者以其罪罪
之亡命山澤挾藏軍器百日不首復罪如初赦書日
行五百里遐邇咸知

冬至大禮大赦制

貞元元年十一月

門下君天下者受命于天地繼業于祖宗致其誠心
惟敬與孝違敬莫大乎廢祀虧孝莫大乎黷神朕以
眇身屬承大統縱欲敗度浸生厲階兵連禍深變起
都邑六師播蕩九服震驚郊廟園陵陷於凶逆神人
乏主將迨周星列聖大業幾墜于地違虧敬孝罪由
朕躬撫臨萬邦甚用自愧側身思咎庶補將來股肱
元臣比義叶德爪牙衆士勦力同心誅大慙而都邑
廓清翦逋寇而關河底定茲再與王公卿尹洎億兆
之人備其盛容脩其禮物薦誠清廟展敬園丘陳謝

罪慙告雪憤耻感慕慙惕若無所容上帝顧懷再新
景命豈伊匪德獨荷鴻休思與普天誕膺多福可大
赦天下自貞元元年十一月十一日昧爽已前大辟
已下已發覺未發覺已結正未結正繫囚見徒罪無
輕重常赦不原者咸赦除之左降官量移近處流入
及藩鎮効力並即放還應有痕玷禁錮前後恩赦節
文未該及者亦宜洗雪勿以爲累李希烈僭逆不道
誠所難容朕憫念蒼生務息征討頻有詔命許其自
新若能歸降依前勅待以不死淮西管內將士官吏
百姓等一切原宥與之如初先有官封亦皆復舊如

能特建功効者當別抽擢若家口親屬在諸道者長
吏綏撫各使安存其歸順百姓仍委節度觀察使刺
史給空閑地任便安居優復終身務令全濟待事平
已後聽歸本貫天下百姓去年十二月已前欠負官
稅官租及諸色人逋懸一物已上但不在官典復內
者一切免放內外文武官見任及致仕官三品已上
賜爵三級四品已下加一階天下諸使諸將軍士三
品已上賜爵一級四品已下加一階白身人賜勳三
轉自頃兗渠倡亂逆臣附姦保據國都憑陵旬服朕
出次郊邑再遷巴梁險阻艱難靡不經歷暴亂之後

陞宣公集 卷二
仍彰烈士之功憂危之中方見直臣之節錄勲進善
其可弭忘應奉天興元元年扈從立功并收京城將
士食實封者各隨文武與一子官餘並加兩階仍賜
勲三轉其文武百官應扈從到興元府者五品已上
賜爵一級六品已下加一階合入三品五品者不拘
考限聽敘其五品已下父母未經追贈者與追贈應
平河中將士即準元勅速與甄獎自建中四年已來
有身死王事義烈著明未經褒贈者本道即具名銜
事跡聞奏諸道有解退官健州府長吏切務安存仍
量以空閑田地給付免其差役任自營生社稷之勲

以輔興王業統帥之任以總制戎麾參袞職者其德
崇授旄節者其功大方鎮乃國之垣翰禁衛實予之
爪牙尹京實賴於肅清主計允資於辦集所頒慶澤
宜越常倫司徒兼中書令晟宜與一子五品正員官
并四品階諸道副元帥與一子六品正員官中書門
下平章事充節度使各與一子七品正員官節度使
及神策兵馬使六軍統軍金吾六軍大將軍判度支
侍郎各與一子八品正員官都團練都防禦等使京
兆河南尹金吾六軍將軍殿前射生兵馬使各與一
子九品正員官多難以來三十餘載克平禍亂屬在

陸宣公集 卷二
戎臣或節著艱危或勲高戰伐受任雖專於總帥成
功亦賴於羣材懋賞推恩宜加胤嗣諸道大將功業
崇高者各與一子官本使即詳定錄名聞奏副元帥
都統兼節度下每道各二十人都團練都防禦使下
各十人如大將子孫之中有藝業優長性行純確者
本使具狀聞薦仍量事資給令赴上都朕當隨材授
官以充侍衛庶使忠臣之後與國無窮故尚父子儀
先朝元勲再復京邑贈太尉秀實以死爲國節冠古
今宜令與子孫一人五品正員官自至德已後節度
使大將有忠烈績効著明其後淪翳者所司即條錄

聞奏與子孫一人正員官諸色人應在賊中潛奉神
主項已甄賞宜便賜優崇三品已上賜爵一級四品
已下加一階江淮轉運使檢校左僕射同中書門下
平章事韓滉勵精勤職夙夜在公漕輓資儲千里相
繼事無憊素人不告勞拯于凶災厥有成績可進封
晉國公關畿之內連歲興戎荐屬天災稼穡不稔穀
糴翔貴烝黎困窮倉廩空虛莫之賑贍每一興念憫
然痛心宜令度支取江西湖南見運到襄州米十五
萬石設法般赴上都以救百姓荒饑如山路險阻車
乘難通仍召貧人令其般運以米充腳價務於全活

流庸庶事優饒副朕勤恤立國之道始於親親所以厚骨肉之恩明教化之本況荐經艱故宗族漂淪敦睦之情有加常典大長公主長公主公主各與一子七品官嗣王郡王郡主縣主各與一子官出身應陪位皇親五等已上諸親三等已上者三品已上賜爵一級四品五品加一階六品已下及常選官散官等簡選日優與處分未出身人量授文武散官如宗子中有德行才能宗正卿具名聞奏當別獎任致理之本在乎審官審官之由資乎選士將務選士之道必精養士之方魏晉已還澆風未革國庠鄉校唯尚浮

華選部禮闈不稽實行學非爲己官必徇人法且非
精弊將安救宜令百寮詳思所宜各修議狀中書門
下參較得失擇善而行有虞建官三載考績在漢爲
吏或長子孫蓋吏久於官則人情不苟官久於事則
理化有成日者制度廢隳考課乖舛淹速靡準升降
無名欲令庶寮何以懲勸自今以後刺史縣令未經
三考不得改移其餘非在職績効殊尤亦不得越次
遷轉刺史停替須待魚書內外五品已上及常參官
在任年考已深者即量才効用與改中外迭處以觀
其能夫明目達聰務廣聞見或慮懷才抱器輸忠納

諫之倫地處幽遐無由自達永言於此夢想不忘應
諸色人有長策濟時忠規匡主任具陳所見詣所居
之州委刺史略與討論觀其旨趣但有裨治道不涉
私情便與附驛遞送朕當親覽自立兩稅經今百年
或初定之時已有偏併或戶口減耗舊額猶存輕重
不均流亡轉甚委度支即折衷條理以卹困窮古者
雖有水旱人無菜色皆由儲畜不匱勸導有方前代
所置義倉國初亦循其制備災救乏甚便於人即宜
準貞觀故事天下所墾見田上自王公下及百姓每
豐稔之歲秋夏兩時州縣長官以理勸課據頃畝多

少隨所種粟豆稻麥逐便貯納以爲義倉如年穀不
登即量取賑給官司但爲其立法勸諭不得收管仍
各委本道觀察使逐便宜處置聞奏敦本厚生必資
播殖當今所切莫甚於斯自今百姓有墾闢田疇加
於常歲者所加之地不得輒徵租稅刺史令長考課
亦以本界墾田多少爲殿最今年蝗旱損甚州府開
春之後量給種子使就農功天下應荒閑田有肥沃
堪置屯田處委當管節度使觀察都團練都防禦等
使刺史審細檢行以諸色人及百姓情願者使管佃
如部署精當收獲數多本道刺史特加褒升屯田等

節度優賞如是逃戶田地本主復業即却給還輦轂
之下四方會同供應既多難爲準定急賦繁役人何
以堪宜令京兆尹與度支計會長安萬年兩縣每季
各先支貯備錢五千貫文於縣庫收納定清幹官專
知應緣卒須別索及雜供擬并工匠等縣令與專知
官先對給價錢季終之後申度支勘會所是和市和
雇並須先給價錢兩稅外一物已上不得科配百姓
御史臺朝廷紀綱尚書省治化根本百度得失繫乎
其人自頃制勅頒行所司多不遵守王臣奉職豈所
宜然委御史臺左右丞切糾稽違無壅朕命南郊太

清宮太廟應職掌行事官郊廟攝將軍中郎郎將及
留守副留守內定行從官三品已上各賜爵一級四
品已下加一階並賜勲兩轉其諸色支供作官司直
長上流外灼然要職掌者並賜勲兩轉行事室長掌
坐齋郎禮生贊者減二年勞無勞可減者簡選日優
與處分崇賢館學生見在者減帖策各一道國子監
陪位學生賜勲一轉介公鄴公各與一子官如無子
孫賜物一百匹神策六軍殿前左右射生英武威遠
皇城左右金吾街使將士應緣大禮宿衛御樓立仗
及守本庫本營者共賜物若干端匹天災作沴深儆

予衷跼蹐憂慚罔知攸措今穀價騰踊人情震驚鄉閭不居骨肉相棄流離殞斃所不忍聞公私之間廩食俱闕旣無賑恤又復徵求財殫力竭繼以鞭箠弛征則軍糧乏贍厚取則人何以堪念茲困窮痛切心骨思所以濟浩無津涯補過實在於增修救患莫如於息費致咎之本旣由朕躬謝譴之誠宜自朕始宜令尚食所進御膳每日各減下一半應宮人等每月惟供給糧米一千五百碩飛龍廄馬從今已後至三十日已前並減一半料京兆府應差科百姓及和市和買等諸色目事無大小一切並停公私債負容待

蠶麥熟後徵理

唐陸宣公集卷第二

Blank manuscript page with vertical columns.

唐陸宣公集卷第三

後學雙峰年羹堯重訂

金壇王汝驤

同校

太倉張泰基

制誥

赦宥

貞元九年冬至大禮大赦制

門下朕以寡德屬當大統皇天眷佑俾主兆人懼不
克承夙夜祇畏緬懷前烈致于昇平予心浩然罔知
攸濟小大之務曷嘗不勤芻蕘之言亦莫不敬慮每
存於致理志常在於恤人中宵屢興終食累歎一事
乖張怒焉疚懷一夫罹殃惻若傷體思與海內同臻

大和息其生業降心從衆實匪有辭克己利人誠無
所恡然以視聽有極思慮難周況乎長自深宮安於
近習損益之理寧免過差幽遠之情固多未達由是
兢兢砥礪悔往修來燭理所患於不明推心庶幾於
無負日慎一日于今十有五年矣上靈降監多士叶
誠五稼屢豐四鄙不擾方鎮輯睦干戈底寧邊壘繕
完殊方款附協天地會昌之運實宗社無疆之休慶
旣荷於元功禮有昭於大報矧惟霜露之感永切孝
思禋燎之儀每勤精意將申誠敬其在躬親是與公
卿大夫虔奉犧牲圭璧陳其文物薦其馨香類秩於

泰壇朝享于清廟率職來助萬邦攸同備物致嚴百
禮具舉誠慕獲展神人允諧明發永懷慶感斯集純
嘏所錫豈惟朕躬思俾普天均承惠澤可大赦天下
貞元九年十一月十日昧爽已前繫囚見徒大辟已
下罪無輕重咸赦除之其見於官辯對者亦並放免
官人犯入已贓不可令其却上已後勿以為累左降
官及流人並量移近處其官已經量移未復資者還
其階爵竄謫遐裔冀速沾恩比者準制量移所司比
例申牒屢加盤覆累涉歲年既甚淹遲且不均一宜
令吏部刑部審勘檢本流貶及量移勅旨比類元犯

事狀輕重兩月內與處分外文武見任及致仕家居
并諸軍諸使將士等三品已上賜爵一級四品已下
加一階應百姓自置義倉仍準貞元元年十一月十
一日制處分立人之道惟孝與忠孝莫大於榮親忠
莫先於竭節惟爾師長卿校洎乎方岳列藩保乂皇
家交修庶績竭節之効旣昭乃誠榮親之恩宜洽國
典内外文武清望職事官并節度觀察都防禦都團
練經略等使父在未有官量授檢校五品官母在未
有邑號者各封邑號父母亡沒者量與追贈已經追
贈者更與改贈佐運之臣納忠之輔功旣存於社稷

慶宜及於子孫故周錫田土漢傳帶礪疇其爵邑與國終始以明報德之恩勸為臣之節其或年代未遠利澤猶存祠宇已變於荒墟胤嗣不編於仕籍思其人猶愛其樹况奠享之主而不加省錄者乎興滅國繼絕代所以禮先賢也修宗廟敬祀事所以教追孝也化俗歸厚此其大端應九廟配享功臣及武德以來將相名節特高有封爵廢絕祠廟無主者宜許子孫一人紹封以時享祀自今以後應有家廟子孫但傳襲封爵者並許享祀于廟其有毀賣私廟及買之者各以犯教義贓論自古聖帝明王忠臣烈士各令

所在長吏以禮致祭書敘明目達聰垂拱而理詩稱
濟濟多士文王以寧舍己從人故能通天下之志棄
瑕錄用故能盡天下之才昔在太宗勤求理道納諫
如響任賢勿疑致俗於太平垂範於永代朕獲承鴻
緒追慕聖猷書之座隅常自儆勵朝夕翹想庶聞嘉
謀夢寐勞懷思得賢士凡厥在位所宜共成諸司官
有陳便宜者各盡所見條疏封進事有冤滯政有闕
遺悉當極言無或隱避詔勅不便於時者所司執奏
以聞天下有蘊德懷才隱居不仕委所在觀察使表
薦當以禮邀致諸色人中賢良方正能直言極諫或

博通墳典達於教化或詳練故事長於著述或精習律令曉暢法理或該明吏術可委理人或洞識韜略堪任將帥者委所在州府長吏及臺省常參官詳錄行能舉奏並限來年七月內到京朕當親試應緣大禮掌職行事仗內引駕攝將軍中郎郎將留守副留守并諸道表狀陪位法駕三引官等三品已上更賜爵一級四品已下加一階其郊壇宮廟行事官仍各賜勳兩轉皇親諸親應陪位者三品已上賜爵一級四品五品加一階六品已下及常選官至選日優與處分白身人及諸色應陪位官等各賜勳兩轉親王

陸宣公集 卷三 四
大長公主郡主縣主賜物各有差鄙公介公各賜物
若干段行事室長掌坐齋郎禮生贊者各減一年勞
無勞可減者至簡選日優與處分崇賢館學生減策
一道國子監學生陪位者及應緣祇應諸司作官直
長長上流外要職掌內侍省白身諸州行綱考典兩
京耆壽諸色番役當上在城并量留十月番人等各
賜勳一轉鴻臚番客共賜物若干神策六軍英武威
遠皇城金吾街使諸軍諸使將士應緣大禮宿衛御
樓立仗及守本庫本營者共賜物若干端匹天下耆
老百歲已上者各賜錦帛五段米五碩八十已上及

鰥寡惇獨不能自存者委刺史縣令各加優恤應緣
大禮加階及賜勲爵等申報敘奏期限並準貞元六
年十二月二日勅處分餘依常式所司不須更作條
件赦書日行五百里布告遐邇咸使聞知

... 車書... 封常... 不... 大... 聯...

蝗蟲避正殿降免囚徒德音

夫人事失於下則天變形於上咎徵之作必有由然
自去歲已來災沴仍集雨澤不降延歷三時蟲蝗既
臻彌亘千里穀糴翔貴稼穡卒痒嗷嗷烝人聚泣田
畝興言及此實所痛傷徧祈百神曾不獲應方悟禱
祀殊救患之術言詞非謝謹之誠憂心如焚深自刻
責得非刑法舛謬忠良鬱堙暴賊未蠲勞師靡息事
或無益而重爲煩費任或非當而橫肆侵蝨有一於
茲足傷和氣本其所以罪實在予百姓何辜重罹殍
餒所宜出次貶食節用緩刑側身增修以謹天戒朕

避正殿不御百寮奏事並於延英處分尚食進膳宜更節減百司不急之務一切且除諸軍將士外自餘應食官糧人及諸色用度等並委本使長官商量權行停減以救荒饉仍限十日內具元額及所釐革條件聞奏待至豐稔却令依舊畿內百姓委京兆尹切加慰撫除正稅正役外徵科差遣並宜禁絕非交相侵奪尋常訴訟不須追擾務且息人京畿內外及京兆府諸縣見禁囚徒死罪降徒流以下一切放免畿內及河中同州界應有因戰陣殺戮遺骸暴露者各委所在長吏隨事薶瘞咨爾卿佐實惟股肱所當一

其誠心同恤災患勉修厥職副我憂勤

Blank columns for text.

誅李懷光後原宥河中將吏并招諭淮西詔

自昔哲王以道化下不竭物以充欲不勞人以樹威
億兆之心如戴父母兵革不試四方來同苟或昧於
德綏務以力勝士旅疲耗烝黎困窮幸以成功豈云
有補李懷光久從戎旅頗著勤勞拔於等倫授以旄
鉞誓師河朔奔難奉天有夷兇嫉惡之誠有弭患釋
圍之績俾介元帥仍升上台秉心匪彛自底不類怙
衆貪亂附姦脅君朕用再遷幾危宗廟洎股肱宣力
賊泚就誅率土之人咸懷奮擊朕獨排羣議未忍加
兵命復官封志期全貸而乃昏迷不返悖慢逾彰殘

害使臣侵敗畿甸密邇京邑人愁無聊諭之不悛乃
用致討上帝悔禍元臣協謀克集茂勲以夷大難渠
魁授首餘衆革心制勝以謀兵無血刃雖事非獲已
義在救人而本其所由情深罪已蓋以信誠未著撫
馭或乖至使功臣陷於誅戮謂之克敵寧不愧心然
以懷光一家法當殲戮念其昔居將相嘗寄腹心罪
雖掛於刑書功已藏於王府以干紀之跡固合滅身
以赴難之勲所宜有後非常之澤俾洽幽明雖屈彛
章庶旌往効大夫君子無我有尤宜以懷光一男爲
嗣賜莊宅各一所聽住京城仍還懷光首級及屍任

便收葬其妻及諸子孫在室女等並遞送澧州委李
臯逐便安置使得存立其出嫁女及諸親戚並宜釋
放應先陷河中將士等皆嬰迫脅無路申明多是朝
方舊人素蘊忠義并幽州涇原將士頃被朱泚脅從
收京之時奔竄在彼究其本末情有足矜況能協力
同謀舉城歸順錄其成效咸與惟新宜一切洗雪勿
爲瑕累先有官爵實封者並許仍舊其中首謀効順
事績著明者委副元帥條件聞奏別加甄獎河中及
同州絳州百姓並經陷賊又久屯軍骨肉流離生業
廢棄興言軫念良用惻然宜各給復一年京兆府奉

先美原等縣緣與同州接近隨便供運杼軸旣繁流
亡頗衆委京兆尹卽量事優恤條件聞奏仍加招輯
使各安存河中保義軍保寧軍節度使并管内諸軍
行營兵馬副元帥河中保寧等軍節度度支營田觀
察處置等使銀青光祿大夫檢校司徒同中書門下
平章事兼太原尹北都留守北平郡王燧惟嶽降生
鬱爲時傑奉上勵匪躬之節訓師懷盡敵之謀略地
無遺攻城必拔發揚以威強寇感激而服叛徒嘉謀
屢聞能事畢備朔方河中同絳陝虢汴等州及管内
諸軍副元帥河中絳州節度觀察處置等使開府儀

同三司行侍中兼河中尹咸寧郡王瑊鑒識精明字
量弘博秉義率衆推誠待人堅制不奪之心亟陳必
勝之略輯睦士旅安慰流庸盛德克彰崇功允集惟
乃二帥一其誠心奉行天誅同獎王室有崇讓之美
有禁暴之能元惡旣除全城底定是加寵命以荅崇
勳燧可兼侍中仍與一子五品正貲官并階餘並如
故瑊可檢校司空仍與一子五品正貲官并階餘並
如故華州潼關鎮國軍節度使開府儀同三司檢校
右僕射并華州刺史上柱國武康郡王駱元光邠寧
慶等州刺史御史大夫上柱國許昌郡王韓遊瓌廊

坊丹延等州節度觀察使檢校兵部尚書兼御史大夫上柱國東平郡王唐朝臣等並節著艱危功成討伐鎮于衝要隱若長城取彼兇殘進無堅陣比義同德廓清方隅宜增食于真封且延榮於胤子可各賜實封二百戶仍與一子六品正員官并五品階餘並如故應諸道諸軍同討懷光將士等一自征役淹歷歲時被服干戈略無寧息賴茲勤効是有成功宜並賜三十萬端匹以充宴賞仰度支即般次送赴並各放歸本道仍令所司敘錄即超資與改轉其中大將及功效殊尤者委所司速具名銜聞奏先與處分其

先在河中將士亦宜依例賜錢宴賞如本是奉天定
難功臣準條合給賞者度支即排比支付嗚呼自國
家多難二紀于茲朕嗣位七年連兵五載追惟往事
悔恨于懷今二孽旣誅諸方甫定哀彼淮右獨爲匪
人其帥不龔其衆何罪朕晨夕惕慮念之甚詳罷征
討則阻命止於數州窮戰爭則流禍及於天下利病
之勢較然相懸俾人罹殃寧我忍耻今勳賢列鎮疆
理有經縱未偃戈足以保境況天地之大無所不容
豈令是邦猶隔朝化因茲大慶使洽鴻恩諸道應與
淮西接連宜且各守封境非被侵軼不須進討仍委

所在長吏明加招諭宣布朕懷李希烈若能歸降待以不死其餘將士官吏百姓等一切並與洗滌與之更新先有官封亦皆仍舊如能去逆効順因事建功理當甄升以示褒勸其所以優賞科條並準前勅處分朕思與海內去危圖安有過自新雖大必宥朗然明信彰示兆人期爾庶邦自求多福無有遐邇咸使聞知

一誅李希烈後原淮西將士并授陳仙奇節度詔
反易天常悖違人紀衆之所棄罔或逃誅李希烈蔑
義背恩窮姦極暴謂神器可以力取謂生靈可以詐
欺志在兇殘躬行僭竊罪無與比法實難容以君德
不修致人於禍究其端本過實在予不忍烝黎重相
攻戰屢施詔命務欲懷柔抑羣帥奮發之誠駐諸軍
討逐之勢不憚屈已期於息人希烈曾無悛心益逞
驕志虐毒滋甚吞噬無厭惡貫既盈自底夷滅開府
儀同三司御史中丞臨漳郡王陳仙奇忠勇有餘沈
毅能斷攄闔境受污之憤導三軍思順之心唱義一

呼羣情響附廓清氛侵殲戮渠魁驛書上聞函首入
獻方隅旣又役戍其休懸賞之科是宜必信其以仙
奇爲檢校工部尚書兼蔡州刺史御史大夫充淮西
節度仍賜實封五百戶應淮西管內將士官吏百姓
等頃迫兇威遂從脅制旣誅元惡俱是平人除李希
烈一家其餘並準前後赦勅原放更無所問其將士
等或本屬平盧或久鎮淮右素推忠義累著勳庸果
能叶志同謀輸誠奉順以茲節効良有可嘉委仙奇
即以諸色官錢優與宴勞其中首建謀議同斬希烈
人等宜並條錄聞奏節次褒賞比年以來有潛圖効

順節義著明計或未行爲賊屠害者亦當審加訪察
具事績以聞如有子孫仍並錄名聞奏百姓等久經
淪陷兼被傷夷遐想凋殘實足哀憫除供當道軍用
外宜給二年應被希烈差點兵馬及團練子弟並即
放散其本額將士之中有不樂在軍願歸農業者委
節度刺史量給逃死戶田宅并借貸種糧優給復終
身使之存濟宜令尚書左丞鄭叔則充淮西宣慰使
嗚呼往欽哉自希烈叛命于今五年王澤不通下情
亦阻所宜宣我信令以釋危疑敷我惠和以慰疲瘵
滌清汚俗咸與惟新底難一方以稱朕意

重原宥淮西將士詔

乃者希烈亂常阻兵竊號污脅士衆殘虐烝黎朕志
在好生誠深罪已爲人受耻不忍加兵惟茲一軍代
著忠節果殲元惡不替舊勲詢於衆情就拜戎帥人
亦勞止期於小康旋乖卹下之方重致喪身之禍由
朕薄德俾人不寧撫臨萬邦且愧且悼猶賴將校士
旅秉其誠心邦人不驚軍部無撓以茲節効良有可
嘉所宜慰安俾洽寬澤應將士吏人承前所有諸過
犯罪無輕重一切釋放曠然昭洗咸與惟新其有先
請受莊宅財物者各以見管爲主將士衣賜節料并

家口糧賜等一切並準舊例以時給付不得停減先
令優與賞設亦準元勅處分務令豐厚以稱朕懷仍
加曉諭各委知悉

唐陸宣公集卷第三

唐陸宣公集卷第四

後學雙峰年羹堯重訂

金壇王汝驤

同校

太倉張泰基

制誥

優恤賜功臣
名改州府

賑恤諸道將吏百姓等詔

國之經制儲畜備災雖遇凶年人無菜色時或弛征
散利務穡勸分徙有以均無因豐而補敗救患之術
抑其次焉自戍役繁興兩河尤極農桑日廢井邑為
墟丁壯服其干戈疲羸委於溝壑傷夷未復荒饑荐
臻歷河朔而至于太原自淮沂而被于洛汭蟲螟為

害雨澤愆時稼穡卒瘁烝黎重困然猶徵賦不息征
役未寧凍餒流離寄命無所興言感悼焚灼于懷朕
聞刑罰失中虐殄斯作致咎之本在予一人萬姓何
辜遭罹其弊兢兢惕畏不敢遑安庶蠲下土之災用
荅上天之戒其宣武等軍宋亳陳州等節度淄青等
州節度河陽懷州節度東都畿汝等州節度潞美軍
澤潞磁邢等州節度保寧軍節度成德軍恒深趙等
州節度易定等州節度每管各賜米五萬碩所司即
般運都於楚州分付各委本道差官受領賑給將士
百姓等務令均洽以惠困窮屬軍費方殷國儲尚歉

今所賜賑給其數非多猶慮孤惇或未周贍穀價翔
貴何能自資江淮之間連歲豐稔迫於供賦頗亦傷
農收其有餘濟彼不足允孚發斂之術且叶變通之
規宜令度支於淮南浙江東西等道量置場加價和
糴米三五十萬碩差官般運於諸道減價出糴貴從
權便以利於人無或勞煩重予不德方岳守將實朕
股肱卹患分憂與朕同體宜即遣使分道宣慰勞勉
將士省問鄉閭有可以救歲之凶災除人之疾苦各
與本道節度使商議具以聞奏必精必詳用稱朕意

臣等聞先王受命於天
 建國設官分土置民
 禮樂刑政各得其宜
 然後天下歸之
 今臣等聞先王受命於天
 建國設官分土置民
 禮樂刑政各得其宜
 然後天下歸之
 今臣等聞先王受命於天
 建國設官分土置民
 禮樂刑政各得其宜
 然後天下歸之
 今臣等聞先王受命於天
 建國設官分土置民
 禮樂刑政各得其宜
 然後天下歸之

優恤畿內百姓并除十縣令詔

朕以薄德託於人上勵精思理期致雍熙鑒之不明
事或乖當百度多闕四方靡寧傷夷未瘳而征役荐
起流亡既甚而賦斂彌繁人怨聞上天災降下連歲
蝗旱蕩無農收惟茲近郊遭害尤甚豈非昊穹作沴
深徹予衷跼蹐憂慚罔知攸措今穀價騰踊人情震
驚鄉閭不居骨肉相棄流離殞斃所不忍聞公私之
間廩食俱竭既無賑恤猶復徵求財殫力疲繼以鞭
箠弛征則軍莫之贍厚斂則人何以堪念茲困窮痛
切心骨思所以濟浩無津涯補過實在於增修救患

莫如於息費致咎之本既由朕躬謝謹之誠當自朕始宜令尚食每日所進膳各減一半宮人等每月惟供給糧米一千五百碩其餘悉皆停省年食支酒料宜減五百碩飛龍殿馬從今已後至四月三十日已前並減半料京兆府百姓應差科徵配及和市和糶等諸色名目事無大小一切並停公私債負容待蠶麥熟後徵收百司非至切之務如追擾百姓及追勘徵收等色府縣並不須承受其尋常訴訟非交相侵奪者亦不得爲理百姓及諸色人等如能力行仁義均減有無賙貸貧人全活數衆者府司具事跡聞奏

朕當授以官秩蠲其征徭如縣令勸導有方流庸克濟至夏初已來類例勘會但戶口無減田疇不荒亦以狀聞量加優獎百姓有迫於荒饑全家逐食者其田宅家具樹木麥苗等縣司並明立簿書印記令所由及近鄰人同檢校勿容輒有毀損及典賣填納差科本戶却歸使令復業夫致理之本必在於親人親人之任莫切於令長導王者之澤以被於下求庶人之瘼以聞于朝得失之間所係甚大且一夫不獲辜實在予況百里之安危萬人之性命付以長吏豈容易哉今旬內凋殘亦已太甚每一興想盡然傷懷非

慈惠不能卹疲忙非才術無以賑艱食臺郎御史選
重當時得不分朕之憂救人之弊昨者詳延羣彥親
訪嘉猷尚書司勳員外郎竇申等十人咸以器能理
道精心究烝黎之疾苦知教化之宗源輟於周行往
涖通邑申可長安縣令鄭珣瑜可檢校吏部員外郎
兼奉先縣令韋武可檢校禮部員外郎兼昭應縣令
賈全可咸陽縣令兼監察御史霍琮可華原縣令兼
監察御史王倉可檢校禮部員外郎兼昭應縣令李
曾可墊屋縣令兼監察御史荀曾可三原縣令兼侍
御史李緄可富平縣令兼殿中侍御史其有散官封

賜者並如故應畿內縣令俸料宜準常參官例均融
加給涇陽縣令韋滌潔已貞明處事通敏有禦災之
術有字物之方人不流亡事皆辦集惟是一邑之內
獨無愁怨之聲古之循良何以過此就加寵秩允叶
前規可檢校工部員外郎兼本官仍賜緋魚袋并賜
衣一襲絹百匹馬一匹嗚呼積行在躬雖微必著咨
乃庶尹其惟欽哉朕聞爲君者必擇人而官爲臣者
罔擇官而處弛張繫於理不繫於時升降在乎人不
在乎位朕方抑浮華以敦教稽言行以進人非次之
恩以待能者彰善黜惡期於必行凡百君子各宜自

勉

[Faint bleed-through text from the reverse side of the page, including characters like 勉, 宣, 公, 集, 卷, 四, 五]

重優復興元府及洋鳳州百姓等詔

朕巡狩山南自春涉夏師旋殷會日費旣廣州閭杼
軸歲計其空東作妨時西成罕望雖黽勉從事人不
告勞而憫悼積衷予實知愧昨者減其租稅優以復
除庶乎有瘳汔用小息洎駕言旋軫躬履畏途絕澗
縈迴危棧綿亘時經霖雨道阻且修工徒造舟縣人
葺路靡幼靡耄莫獲寧居而又齎負糗糧供備頓舍
涉于千里飫我六師居人露處以罔依宿麥過時而
不獲覩茲妨奪彌增感傷前所復除未足酬卹式敷
惠澤以紓大勞其興元府除先優復外宜更給復二

年鳳州全放今年稅其興元府鳳州界內知頓及修
道路閣橋州縣官將士等並委嚴震類例功效具名
聞奏量與甄獎嗟乎古先哲王東征西怨顧予不德
重以勞人補費錄勤是有申命長吏明加優諭稱朕
意焉

議減鹽價詔

三代立制山澤不禁天地材利與人共之王道寢微
強霸爭騫於是設祈望之守興權管之法以佐兵賦
以寬地征公私之間猶謂兼澤歷代遵用遂為典常
自頃寇難荐興已三十載服干櫓者農耕盡廢居里
閭者杼軸其空革車方殷軍食屢調人多轉徙田畝
汙萊乃專煮海之利以為贍國之術度其所入歲倍
田租近者軍費日增權價日重至有以穀一斗易鹽
一升本末相踰科條益峻念彼貧匱何能自滋五味
失和百疾生害以茲天斃實為痛傷嗚呼朕丕承列

聖之緒遐覽前王之典既不克靜事以息用又不獲
弛禁以便人征利滋深疲眈致困予則不恤其誰省
憂應江淮并峽內權鹽宜令中書門下及度支商議
裁減估價兼釐革利害速具條件聞奏削去苛刻止
塞姦訛務於利人必稱朕意

賜京畿及同華等州百姓種子賑給貧人詔

春陽布和萬物暢茂實兆庶樂生之日農夫致力之時今茲吾人則異於是迫以荒饉愁怨無繆有離去井疆業於庸保有乞丐途路困於死亡鄉閭依然煙火斷絕種餉既乏農耕不興若東作僛時西成何望爲人父母得不省憂雖國計猶虛公儲未贍濟人之急寧俟盈豐罄其有無庶拯艱厄京兆府百姓並宜賜種子二萬碩同華州各賜三千碩陝虢兩州賜四千碩委州長吏即於度支計會請受差公清仁恤之吏與縣令親至村閭隨便給付仍加勸課勿失農時

應諸倉所有遠年粟麥宜令節度更分二萬碩京兆
尹即差官逐便般載賑賜貧人先盡鰥寡孤惻目下
不濟者務令均給全活流庸嗚呼朕德之不敷誠之
不感上帝降割丁寧厥躬元元何辜罹此災害思欲
拯救未知其方長人之官寄任斯重所宜極慮與我
同憂勉敷惠和以育疲瘵佇聞良術稱朕意焉

賜將士名奉天定難功臣詔

國家受天明命平一字內自武德迄于天寶百四十載海內無事崇德廣化澤浸生人時洽和平俗登富教鰥寡孤獨咸得其所鳥獸魚鼈亦罔不寧凡今有生實賴亭育羯虜伺間盜起幽燕率土之人莫保性命肅宗以神武戡大難先朝以仁德紹興運區域再造億兆再康室家離析而復安子孫煦嫗而相長勞來安集垂三十年則我列聖之於天下惠澤深矣朕以寡昧祇膺寶曆常恐不克負荷罔敢怠荒道有未明事多乖謬羣情壅而不達大信鬱而不彰兩河之

間羣盜連禍朕務除大患靡憚暫勞是以興有征之
師問干紀之罪昨以涇原士徒將赴汝郊失於撫綏
致使潰叛朱泚乘釁因構異圖肆其狼心誘我蝨賊
謂君可叛謂天可欺縱恣凌悖無所愧畏朕失守宮
闕出次郊畿九廟震驚萬姓奔駭內省思咎外顧懷
慙罪實在予不敢自蔽意者宗社降祐大倣于朕躬
夙夜殷憂庶乎有補實賴股肱心膂勵從戎之節方
岳將校集勤王之師赴難如歸見危思奮堅貞勵操
何日忘之平巨猾者必仗羣雄賞茂績者不限彝典
保勲庸於帶礪傳爵邑於子孫崇功美名與國終始

其諸軍使應到奉天縣將士等宜並賜名奉天定難
功臣食實封者子孫相繼代代無絕身有過犯遞減
罪二等子孫有過犯遞減罪一等當戶應有差科徭
役一切蠲免其功臣已後雖衰老疾患不任軍旅者
當分糧賜等並與全給身死之後回給家口十年勿
絕如有能梟擒朱泚者即以朱泚在身官爵授之仍
加實封二千戶朱泚所有田宅財物悉並充賜其梟
擒賊大將已下并節級特加優寵仍各與實封應梟
擒人所有田宅財物亦使賜之其餘立功應合授官
給賞並準今年七月勅處分其今日已前身死王事

者追贈官爵亦稱奉天定難功臣子孫為功臣之家
應合襲封減罪蠲免差役等一切同例宣告中外令
知朕懷建中四年十一月二十三日

改梁州爲興元府升洋州爲望州詔

自昔多虞順時而動古公避狄兆永祚於岐下高帝
徙蜀建雄圖於漢中王蹟所興子孫是奉覩遷居於
遐阻知致君之艱難矧天下爲家不常厥邑王者所
至四方會同崇號設都於是乎在朕遭罹寇難播越
梁岷烝庶煩於供億武徒勤於扞衛凡百執事各奉
厥司人皆競勸物以豐給嘉乃成績予懷不忘今大
憝已除京邑甫定將旋法駕展敬園陵眷于是邦復
我興運宜其崇大以示將來古者天子省方則問耆
年卹百姓以頒慶賜以茂勲勞用弘布澤之恩式慰

來蘇之望宜改梁州為興元府其署置官資望一切
與京兆河南府同南鄭縣升為赤縣諸縣並升為畿
縣見在州縣官各令終考秩至考滿日放選依本資
處分者壽與板授五品官仍並賜緋先已賜緋並賜
紫典正等各賜勳五轉百姓除先減放稅錢外更給
復一年洋州宜升為望州見任州官亦並令終考秩
并諸縣官等各減兩選無選可減者各加三階應山
南西道節度下將士除扈從迎駕已經改官者餘並
即與甄敘嗚呼古先哲王東征西怨顧予不德重于
勤人撫心咎已良增愧歎宣示有衆明知朕懷

唐陸宣公集卷第四

陸宣公集

卷四

七